



19. november 2020
Atassut

UKA 2020/67
Aqqalu C. Jerimiassen

Qilalukkat nipinut illersorneqarnissaat siunertaralugu kangerlunni qaqqortat qernertallu sivilunerusumik najortagaanni angallatit aalajangersimasut ingerlaartarnerisa killilerneqarsinnaananeranut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq UKA2021-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartunut ilaasortaq Jens NapātôK´ Partii Naleraq)

Imartatsinni uumasut illersungaannissaat tamatigut suleqatigiiffigisariaqarparput, uanilu Partii Naleqqami maanna saqqummiunneqartumi Atassummi assut soqutiginaateqartipparput qanoq suleqatigiittoqarsinnaanera tamatsinnut pitsaanerpaamik minnerpaamillu innarliutaavallaanngitsumik, ilaatigut kilisaaterujussuit umiarsuillu takornariartaatit eqqarsaatigalugit.

Puigussanngisarpulli aajuttaaq, inuussutissarsiornerput killilersorpallaalissannginnatsigu inatsiseerarpassuarnik pilersuiniarpallaanikkut, tassami nunap ingerlarngani innuttaasut naammagittaallioqqajaanerulertuartarput inatsiserpassuit piuniartillugit.

Apeqqusinngilarpulli, ilumut kangerlutta ilai illersortariaqaratsigit piniakkat assigiinngitsut ulluinnarni inuunitsinnut attuumassuteqartut eqqarsaatigalugit, imaanngitsorli taava tassa suna tamarmi tassani piffimmi mattutivinneqassasoq.

Tassami inuussutissarsiutit ilai sapinngisamik ilaluarinaversaartariaqarpagut, soorlu ilaatigut maanna nipi piulersoq takornarialerineramik annertungaartumik ingerlataqartuunikuulluni annernartaqisoq ”takornarialerisuungaluarpataasiit taamannaq pereeraluarpaat”, tamatta maani najungaarpugut inoqarfinni sumiikkaluaruttaluunniit, taamaammallu takornariartaatit umiarsuit eqqarsaatigalugit mattussivissinnaaneq mianerisassaasoq Atassummiit isumaqarluta.

Tassami umiarsuit takornariartaatit aaqqiivigineqarsinnaangaluarput angissusai malillugit mattutiinnaqinagit, sapinngisamik angivallaarujussuartut 3000-it tungaanut ilaasoqartartut migutsitsisinnaaqisut kangerlunnut pulaararsinnaaneranut eqqummaarfeqarnerunissamik periusissiaqarnikkut.

Kilisaatit aalisariuterujussuillu eqqarsaatigissangaanni, eqqarsaatigissassaq tassani annertungaatsiarpoq, tassami sumiiffiit inuussutissarsiummik ingerlaqarfiulluurtut nunatta aningaasalersorneqarneranut sunniutaaqisut innarlernaversaagassarigatsigit, taamaakkaluartorli

biologit innuttaasullu uani suleqatigiisinneqarluartariaqarnerat pisariaqartoq Atassummiittaaq siunertaarput. Biologit nunatta imartaani qilalukkat ingerlaarfiinik erseqqarinnerpaanik peqartariaqalerput kilisattut eqqarsaatigalugit, sapinngisamik qilalukkat ingerlaarfiisa nipimik ajoqusersorneqannginnerpaaffissaminiinnissaat eqqarsaatigalugu aalisarfiusinnaasunik sumiiffinni aaliangersimasuni immap assigini titarsisinnaaneq pilersinneqassappat.

Taamatut oqaaseqarluta Atassummiit siunnersuut ataatsimiitsitaliamut innersuupparput.